

Канон Преполовения Пятидесятницы

Ирмосы, глас 8-й

Песнь 1. Море огустил еси, / погруживый со оружием
гордаго фараона, / и люди спасл еси немокренно Господи, /
и ввел еси я в гору святыни, вопиющая: // поим Тебе, Богу
нашему, песнь победную, яко прославися.

Песнь 3. Утвердися сердце мое во Господе, / вознесся
рог мой в Бозе моем, / расширися на враги моя уста моя, //
возвеселихся о спасении Твоем.

Песнь 4. Пророк Аввакум умными очима / провиде,
Господи, пришествие Твое, / тем и вопиаше: от юга придет
Бог. / Слава силе Твоей, // слава низхождению Твоему.

Песнь 5. Господи Боже наш / мир даждь нам, / Господи
Боже наш, стяжи ны, / Господи, разве Тебе иного не вемы, //
Имя Твое именуем.

Песнь 6. Яко воды морския, Человеколюбче, / волнами
житейскими обуреваюся, / темже, яко Иона, тако вопию Ти: /
возведи от тли живот мой, // Благоутробне Господи.

Песнь 7. Халдейская пещь, огнем распалаемая, /
орошашеся Духом, / Божиим предстоянием, / отроцы пояху: //
благословен еси, Боже отец наших.

Песнь 8. Ангели и небеса, / на престоле славы сидящаго /
и яко Бога непрестанно славимаго, / благословите, пойте //
и превозносите Его во веки.

Песнь 9. Чужде матерем девство, / и странно девам
деторождение, / на Тебе Богородице, обою устроишася. /
Тем Тя вся племена земная // непрестанно величаем.

Тропарь Преполовению, глас 8

**Преполовившуся прázднику,/ жаждушую дúшу мою
благочестия напо́й вода́ми,/ я́ко всем, Спа́се, возопи́л еси́:/
жажда́й да гряде́т ко Мне и да пи́ет.// Исто́чнице жи́зни на́шея,
Христé Бо́же, сла́ва Тебе́.**

Кондак Преполовению, глас 4

**Прázднику зако́нному преполовля́ющуся,/ всех Тво́рче
и Влады́ко,/ к предстоя́щим глаго́лал еси́, Христé Бо́же:/
прииди́те и почерпи́те во́ду безсме́ртя./ Те́мже Тебе́
припа́даем и ве́рно вопие́м:/ щедро́ты Твоя́ да́руй нам,//
Ты бо еси́ Исто́чник жи́зни на́шея.**